

## 4. KAIN O ABEL

### Enkiterunoto 4

Ore ake pee eidip Enkai aipang'ie Adam o Hawa te nkurma, nenutayu Hawa neiu enkayioni. Ore egira Hawa aisho nejo, "Te nkidimata Olaitoriani aidima atoiu olee." Neipot enkayioni aajo Kain. Ore pee elusoo erishata, neitoki Hawa aiu enkayioni neipot enkarna ajo Abel. Nebulu Kain neaku olaturoni le nkurma. Nebulu sii ninye Abel neaku olchekut lo inkerra.

Ore nabo olong' neyaki pokira Enkai olasar. Neyau Kain olasar le nkurma enye, ilng'anayio o kulie pukunot oo ndaiki enkurma. Neyau Abel irbalelo le dukuya oopir loo nkerra enyena, neitayu olasar neibukoo osarge. Nenyoraa Enkai olasar le Abel kake neany olasar le Kain.

Negoro Kain oleng'. Nejoki Enkai Kain, "Kainyoo pee itagore? Ore pee ias embae sidai, naa kaanyoraa." "Kake tenaa ias embae torrongo, kigira ing'ok aarresh te kutuk aji." Naa iyie eyieu nikimbung' kake eishiakino nimir ninye."

Ore pee elusoo erishata naje, nejoki Kain olalasho lenye Abel, "Maape enkurma." Ore epoito tiatua enkurma, near Kain Abel nelo aing'uaa.

Neaku, nejoki Enkai Kain, "Amaa, koree olalasho lino?"

Nejoki Kain ninye, "Mayiolo nanu. Amaa, kara olaing'orani lo lalasho lai?"

Nejoki Enkai, "Aaishiraki osarge lo lalasho lino te nkop! Kitediaaki! Mikintoki enkop aiki ilng'anayio. Miata inchere pee ming'uaa ene wueji nilo amanaa tenkop pooki."

Nejo Kain, "Oi! Kegol ena oleng' te nanu! Kintayu nanu aitung'aa enkop. Kintayu nanu aitung'aa enkomom ino naa ore pooki laadol na kaar nanu matua!"

Nepik Enkai olmoniekie Kain nejo, "Ore oliking'em iyie, naa kalaaki inkatitin naapishana." Neaku nelo Kain amanaa too nkuapi pooki.

Neaku enotito Adam o Hawa enkai ayioni, neipot enkarna enye ajo Seti pee ejing' erishata e Abel otua. Netum Kain inkera, kake inkera torrok nemeisis Enkai. Netum sii Seti inkera. Naserem ninche Enkai.

### ENKIPANGATA E NKISOMA

#### **ENE DUKUYA: Inkilikuana ena kilikuanata eton eitu iliki enkatini**

- Indim atadamu erishata ninoto olom tialo likae tung'ani, nikirikoki ina taasa entoki torrongo? Imaki tenebo ilo liboitare litaaniki.

#### **ENKATINI: Toliki enkatini ningiligili tenebo anaa olturrur pee eyiolo pooki ng'ae**

#### **INKIKILIKUANAT NAIMAKINI TENEBO: Taasishore kuna kilikuanat pee irororie tenebo enaikununo enkatini**

#### **KAINYIOO KINTENG'ENA ENA ATINI NAIPIRTA ENKAI?**

- **Kaji eiko teneitodolu ena atini nchere keata Enkai enkidimata sapuk?** (engolon, enkitoria)
  - Keata enkitoria peyie edol easata e nena yieunot enyena tenkaraki ninye oitobirua iyiook.
  - Etaraayie Kain meipang'a alool

- Eitanap iltung'ana meyau olasar oshiakino pee enyikakinyieki ninye te nkoitoi e seremare.
  - Neisho Adam o Hawa Seti te rishata e Abel.
  - Nepik olmonokie le mitunoto Kain.
- **Kaji eiko teneitodolu ena atini nchere KEYIOLO Enkai pooki toki? (netii pooki wueji)**
    - Etayiolo indamunot o ltau le Kain.Neyiolou Engoro, olom, sura.
    - Keyiolo oltau,o enetaasa Kain peyie eyau olasarr oishiaa te dukuya Enkai.
    - Nejo, "Aaipotito osarge lo lalashelino tenkop."
- **Kaji eiko teneitodolu ena atini nchere eisinyati Enkai? (keitoriori, kaasipani, neishoru inkitanapat, niba ing'ok, neipotu keeya metaa olekoisiayio loo ng'ok)**
    - Eitamio Kain tenkaraki ing'ok enyena nearaa, nedek enkop tenkaraki o tialo ninye.
    - Eidim ake oltung'ani ayeu enetii Enkai tenkoitoi najo ninye ake. Eiyieu Enkai olasar oshiaakino pee enyikaki oltung'ani ninye. Neidim oltung'ani ayau ilo asar tiatua enkirukoto.
    - Ore tenkaraki naatai olasar sidai o Itorrone, neitodolu ina inchere Aisinyati Enkai.
    - Ore olasar le Abel netang'amayie Enkai te nchipai. Amu eyawua Abel ilo asar tiatua enkirukoto.
- **Kaji eiko ena atini teneiteng'en iyiook inchere keata Enkai empiris?( kenyorrisho, keata olng'urr tialo ilaing'okok, nenana oshoke, neton ake eirorie oltung'ani)**
    - Eishoo Kain erishata pee eirridu. Amu eikilikuana enetii olashe lenye. Naa Neikok ninye te naipirta ing'ok naarreshito te kutukaji enye.
    - Neishoru enkoitoi pee errinyokino oltung'ani shoruetisho o Enkai tiatua olasar osipa.
    - Neirorie Enkai oltung'ani aliki enaiko tenerrinyunyie alotu enetii ninye te nkoitoi e seremare.
    - Etipikaka kain olmonekie arrip ninye, ata tenaa olaing'okoni arashu hoo nemenarikino.
- **Kaji eiko ena atini teneutaki iyiook inchere KEISILIGAYU Enkai? ( meibelekenya, keibung inkisiligat enyena, keas sii inaja)**
    - Eishoo Adam o Hawa Seti te rishata e Abel.
    - Etolikio ajo ore kenya naa kerriu Olaitajeunoni tiatua eishoi e Hawa. Keitabaya enetejo tiatua Seti.
    - Etejo keidim atorripo Kain, neas.

### **KAINYIOO KINTENG'ENA ENA ATINI NAIPIRTA OLTUNGA'NI?**

- **Keitodolu ena atini ajo keata oltung'ani tipat te Nkai? Tia oitoi?**
  - Keyieu Enkai shoruetisho enye. Neaku eitobirua enkoitoi pee eirridu iltung'ana neshukunye aserem ninye.
- **Keitodol ena atini ajo keata oltung'ani ing'ok naa keishiakino pee eitame Enkai oltung'ani tenkaraki ing'ok enyena?**
  - **Amaa, etii aji etoiwuoki Kain o Abel?** Mme tiatua enkurma e Eden, kake ti aulo! Etoiwuoki anaa ilaing'okok tenkaraki ing'ok o intoiwuo enye. Ore pee eini, netii boo e nchula e Enkai neata sii iltauja ooyieu negolong'aki Enkai.
  - Neijia sii etiu iltung'ana pooki. Etoiwuoki tiauluo olchampa le Nkai.Tia uluo shoruetisho e Nkai.
  - Keyieu apa Kain nenyikaki aashu eserem Enkai te nkoitoi enye makewan, mme ene Nkai! Eitu eyau olasar oshiaakino.Neitu elotu te nkirukoto anyorraa inchere olaing'okoni neyieu enjeunoto naing'uaa Enkai.
  - Kegoro Kain neata olom.
  - Etayiewua apa Kain nearr olashe lenye tenkaraki ing'ok natii atua oltau lenye.

- Kain, nesuj enkitanyaayukoto o Shetani.
  - Etejo Enkai, “Kegira ing’ok aarresh te kutuk aji anaa olapurroni. Naa keyieu nikimbung’. Ore anaikoni teneirishi ing’ok naa olarrabal oidipunye ilo. Amu keyieu neibung’ iyiook.
- **Keitodol ena atini ajo keyieu oltung’ani Enkai kake meata engolon naidim aitajeunye kewan?**
    - Ore pee enyok Kain anyikaki Enkai te nkoitoy enye makewan, neany Enkai ninye.

### **KAINYIOO KINTENG’ENA ENA ATINI NAIPIRTA OSOTUA OLTUNG’ANI O ENKAI? (ENJEUNOTO)**

- **Keitodolu ena atini ajo keidim oltung’ani ayeu enetii Enkai eimu enkoitoy e Nkai ake, mme enkoitoy enye? (te yieunoto Enkai o nkipangata enye makewan?)**
  - Eewuo Abel aserem Enkai te nkoitoy Enkai, neaku tiatua enkirridunoto o enkirukoto. Neitodol enkirukoto enye tiatua olasar lo sarge. Neaku etang’amua Enkai ninye.
  - Eidimayu netuutaitie intoiwuo enyena Abel tialo enaiko tenlotu enetii Enkai, anaa apa enatuutayie Enkai ninche te nkiterunoto.
  - Nelotu ninye Kain enetii Enkai te Nkoitoy enye makewan kake eitu enyorrarri te dukuya Enkai.
- **Keitodolu ena atini ajo keshiakino pee eata oltung’ani enkirukoto o enkirridunoto pee eitiship Enkai netum sii enjeunoto?**
  - Etonyorrarayie Enkai Abel amu eteserema Enkai te nkirukoto. Neyawua olasar oitiship Enkai, olasar lo sarge, lkuo oisul naa olkikau. Nelotu temborron. Neibalunye ing’ok enyena, nepik osiligi lenye atua Olaitajeunoni olotu eyau olasarr oitoriori. ( ilhebrania11:4,6)

### **INKIKILIKUANAT NIKIASISHORE TE NKIBELEKENYATA E NKISHUI:**

- Amaa, kaji kitoiwunyeiki? Tiatua enkurma e Eden arashu ti aulo? Kitoiwuoki te ishoy e Hawa? Neaku ira nyoo arashu ng’ae? (Olaing’okoni) Amaa, ketii oltung’ani hoo obo lemeas ing’ok?
- Amaa, oshi tenias ing’ok, ng’ai igira aitame? (Enkai! O iltung’ana sii.)
- Amaa, keata Enkai engolon arashu enkitoria te shumata iyie? Kainyoo?
- Amaa, keton eyiolo Enkai pooki toki? Keyiolo inkiasin inono? Aashu indamunot? Amaa, ketii ewueji hoo nabo nindim ashomo pee medol Enkai ing’ok inono?
- Amaa, keyieu Enkai nikias enayieu ninye? Keiba ninye tenikigolong’aki? Meishiaakino teneitame Enkai iyiook tenkaraki ing’ok ang?
- Amaa, keton eata Enkai olong’ur to ltung’ana otaasa ing’ok? Eishoo iyiook enkoitoy pee kilany enkitamioto?